

# DIE BRIEF AAN TITUS

## Inleiding

*Die Brief aan Titus* maak saam met *1 en 2 Timoteus* deel uit van die sogenaamde Pastorale Briewe. Hierdie briewe word so genoem, omdat hulle bedoel was om pastorale leiding aan die leiersfigure in sekere gemeentes te gee.

As aanvaar word dat Paulus die outeur van hierdie brief was, is dit geskryf nadat hy uit sy eerste gevangenskap in Rome vrygelaat is, na alle waarskynlikheid in 62-63 nC. Hy het moontlik die brief uit Macedonië geskryf (vgl 1 Tim 1:3), voordat hy vir die komende winter in Nikopolis (Tit 3:12) sou aankom.

Die skrywer identifiseer homself as die apostel Paulus (1:1). Weens die styl, besondere omstandighede en sekere teologiese aspekte van hierdie brief, meen heelwat geleerdes dat dit in 'n later stadium deur 'n toegewyde volgeling van Paulus in die naam van sy leermeester geskryf is. Nietemin is daar goeie oorwegings vir die aanvaarding van die tradisionele standpunt dat Paulus die outeur van hierdie brief was.

Die brief is gerig aan Titus, 'n jarelange en getroue medewerker van Paulus. Paulus het hom in Kreta agtergelaat om bepaalde reëlins vir die goeie funksionering van die gemeentes te tref. Ná afhandeling van sy opdragte, moet hy Paulus vir die komende winter in Nikopolis ontmoet (3:12).

Paulus se opdrag aan Titus is dat hy moet toesien dat die regte ouderlinge in die onderskeie gemeentes aangestel word (1:5-9). Verder moet Titus teen die dwaalleraars optree (1:10-16), en pastorale leiding gee oor hoe die gelowiges teenoor mekaar (2:1-15) en in die samelewing (3:1-11) moet optree. Paulus tref ook 'n aantal praktiese reëlins (3:12-13).

Soos in *1 Timoteus*, gaan dit in *Titus* om die regte bediening, die verkondiging van die suiwer leer en 'n voorbeeldige Christelike leefstyl. Paulus tree as mentor op om aan Titus leiding te gee oor sy optrede in die betrokke gemeentes.

Die boek kan soos volg ingedeel word:

1:1-4 Brieffaanhef

1:5-9 Eienskappe van 'n goeie ouderling

1:10-16 Teenstanders in Kreta

2:1-15 Optrede van gelowiges teenoor mekaar

3:1-11 Optrede van gelowiges in die samelewing

3:12-15a Laaste opdragte en groete

3:15b Seëngroet

## 1

<sup>1</sup> Paulus, 'n dienskneg van God en •apostel van Jesus •Christus ter bevordering van die geloof van die uitverkorenes van God en hulle kennis van die waarheid wat ooreenstem met godvresendheid, <sup>2</sup> in die hoop op die ewige lewe wat God, wat nie kan lieg nie, reeds voor alle tye beloof het, <sup>3</sup> en wat sy woord op sy eie tyd bekend gemaak het deur die verkondiging\* wat in opdrag van God, ons Verlosser,\* aan my toevertrou is —

---

\*1:3 wat sy ... verkondiging: Ef 1:9-10

\*1:3 die verkondiging ... Verlosser: 1 Tim 1:1,11; God ons Verlosser: Tit 2:10; 3:4

<sup>4</sup> aan<sup>a</sup> Titus,<sup>\*</sup> my egte seun op grond van ons gemeenskaplike geloof:<sup>\*</sup> Genade<sup>b</sup> en vrede van God, ons Vader, en Christus Jesus ons Verlosser.

### Eienskappe van 'n goeie ouderling

<sup>5</sup> Hiervoor het ek jou in Kreta laat agterbly: dat jy onafgehandelde sake kan afhandel en in elke dorp<sup>c</sup> ouderlinge kan aanstel soos ek aan jou opgedra het. <sup>6</sup> \*Dit moet iemand wees wat onberispelik is, 'n man met een vrou en met gelowige kinders, wat nie van losbandige gedrag beskuldig kan word of opstandig is nie. <sup>7</sup> Want 'n opsiener moet, as bestuurder oor die huishouding van God, onberispelik wees: nie eiesinnig of humeurig nie, iemand wat nie te veel drink of skoorsoekerig is of oneerlike wins najaag nie; <sup>8</sup> maar gasvry, lief vir die goeie, verstandig, regverdig, toegewyd en selfbeheersd. <sup>9</sup> Hy moet hom hou aan die betroubare woord, in ooreenstemming met die lering, sodat hy deur die gesonde leer<sup>\*</sup> kan bemoedig, en ook hulle wat dit teengaan, kan verkeerd bewys.

### Teenstanders in Kreta

<sup>10</sup> Want daar is baie opstandiges, praatjiesmakers en mense wat ander mislei, veral onder hulle wat besny is, <sup>11</sup> van wie die mond gesnoer moet word — mense wat hele huishoudings omvergooi<sup>\*</sup> deur ontoelaatbare

---

<sup>a</sup>**1:4 aan:** In die formele briefstyl soos deur die skrywer gebruik, ontbreek die werkwoord wat in die gedagte aangevul moet word, naamlik “skryf” aan.

<sup>\*</sup>**1:4 Titus:** 2 Kor 8:23; Gal 2:3; 2 Tim 4:10

<sup>\*</sup>**1:4 my egte ... geloof:** 1 Tim 1:2

<sup>b</sup>**1:4 Genade:** Sommige mss voeg hierna in “barmhartigheid”.

<sup>c</sup>**1:5 dorp:** Die Griekse woord *polis* (stad) kan verwys na 'n ommuurde stad of 'n dorp; dit word onderskei van die platteland of landelike area; •Stad.

<sup>\*</sup>**1:6-9** 1 Tim 3:2-7; 2 Tim 2:24-26

<sup>\*</sup>**1:9 die gesonde leer:** 1 Tim 1:10; 2 Tim 4:3; Tit 2:1

<sup>\*</sup>**1:11 mense ... omvergooi:** 2 Tim 3:6

dinge te leer, en dit vir skandelige gewin.\* <sup>12</sup> Een van hulle mense, hulle eie profeet, het gesê:

Die mense van Kreta is ewige leuenaars,  
slegte ondiere, lui vrate!\*

<sup>13</sup> Hierdie getuienis is waar. Daarom, spreek hulle skerp aan,\* sodat hulle gesond kan word in die geloof <sup>14</sup> en hulle nie meer besig hou met Joodse mites\* en menslike voorskrifte wat van die waarheid afwyk nie. <sup>15</sup> Alles is rein vir dié wat rein is,\* maar vir die besoedeldes en ongelowiges is niks rein nie: sowel hulle denke as hulle gewete is besoedel. <sup>16</sup> Hulle bely dat hulle God ken, maar weerspreek dit met hulle dade;\* hulle is afstootlik en onversetlik, onbekwaam om enigiets goeds te doen.

## 2

### Optrede van gelowiges teenoor mekaar

<sup>1</sup> \*Maar jy, verkondig jy wat pas by die gesonde leer.\* <sup>2</sup> Ouer manne moet nugter wees, waardig, verstandig — gesond in geloof, liefde en standvastigheid.

<sup>3</sup> \*Net so moet ouer vroue se optrede wees soos dit •heiliges betaam.

---

\*1:11 vir ... gewin: Joh 10:12; 1 Pet 5:2

\*1:12 Die mense ... vrate: Epimenides, *de Oraculis*

\*1:13 spreek ... aan: 2 Kor 13:10; 2 Tim 4:2

\*1:14 hulle ... mites: 1 Tim 1:4; 4:7

\*1:15 Alles ... rein is: Matt 15:11; Rom 14:20

\*1:16 Hulle ... dade: 1 Joh 1:6; 2:4

\*2:1 2 Tim 1:13

\*2:1 die gesonde leer: 1 Tim 1:10; 2 Tim 4:3; Tit 1:9

\*2:3 1 Tim 3:11

Hulle moet nie kwaadpraters wees, of verslaaf aan wyn nie, maar moet onderrig gee in wat goed is, <sup>4</sup> sodat hulle die jong vroue kan leer om liefdevol teenoor hulle mans en kinders te wees, <sup>5</sup> verstandig, kuis, toegewy aan hulle huishoudings, goedaardig, onderdanig aan hulle mans, \* sodat die woord van God nie belaster word nie.

<sup>6</sup> Vermaan ook so die jonger manne om in alle opsigte verstandig op te tree. <sup>7</sup> Stel jy self in alles 'n voorbeeld deur goeie dade, \* onvervalste leer en waardigheid, <sup>8</sup> gesonde en onaanvegbare prediking, sodat 'n teenstander beskaamd mag staan en niks slegs het om oor ons te sê nie.\*

<sup>9</sup> Slawe moet in alles aan hulle eenaars onderdanig wees: \* hulle tevrede stel, nie teenpraat nie en <sup>10</sup> nie steel nie, maar toon dat alle betroubaarheid goed is, sodat hulle in alles die leer van God ons Verlosser\* aantreklik maak.

<sup>11</sup> Want die verlossende genade van God het verskyn vir<sup>d</sup> alle mense <sup>12</sup> en voed ons op, sodat ons in hierdie bedeling verstandig en regverdig en godvresend kan leef\* deur goddeloosheid en wêreldse begeertes te verwerp.\* <sup>13</sup> Dit terwyl ons uitsien na die salige hoop en glansryke verskyning van ons groot God en Verlosser, Jesus •Christus —

<sup>14</sup> Hy wat Homself ter wille van ons gegee het\*

---

\*2:5 onderdanig ... mans: Ef 5:22

\*2:7 Stel ... dade: 1 Tim 4:12; 1 Pet 5:3

\*2:8 'n teenstander ... sê nie: 1 Pet 2:15

\*2:9 Slawe ... wees: Ef 6:5; 1 Tim 6:1; 1 Pet 2:18

\*2:10 God ons Verlosser: Tit 1:3; 3:4

<sup>d</sup>2:11 vir: Word ook vertaal “aan”.

\*2:12 sodat ons ... leef: Ef 1:4

\*2:12 goddeloosheid ... verwerp: 1 Joh 2:16

\*2:13 1 Kor 1:7; Fil 3:20

\*2:14 Hy ... gegee het: Gal 1:4; 2:20; 1 Tim 2:6

om ons los te koop<sup>e</sup> van alle wetteloosheid\*  
en vir Hom 'n eie volk as eiendom te reinig\*  
wat ywerig is om goed te doen.\*

<sup>15</sup> Praat oor hierdie sake met volle gesag, bemoedig en wys tereg. Moenie dat iemand op jou neersien nie.\*

### 3

#### Optrede van gelowiges in die samelewing

<sup>1</sup> Herinner hulle daaraan om aan die owerheid en alle gesag onderdanig te wees,\* om gehoorsaam te wees en bereid tot elke goeie werk,  
<sup>2</sup> niemand te belaster nie, om nie bakleierig te wees nie, maar vriendelik, en om ware sagmoedigheid te betoon aan alle mense. <sup>3</sup> Want ons was ook voorheen onverstandig,\* ongehoorsaam, verdwaal, verslaaf aan allerlei begeertes en luste. Ons het in kwaadwilligheid en naywer geleef, ons was haatlik en het mekaar gehaat.

<sup>4</sup> Maar toe die goedheid en menseliefde van God, ons Verlosser,\* verskyn,

---

**<sup>e</sup>2:14 los te koop:** Destyds was 'n slaaf die eiendom van sy eienaar. Elke slaaf het 'n bepaalde geldwaarde (of prys) gehad. 'n Eienaar kon instem dat 'n slaaf sy vryheid kry wanneer iemand die eienaar vergoed vir die verlies van die waarde van sy slaaf deur die slaaf se “prys” te betaal. Só is 'n slaaf “losgekoop”.

**\*2:14 om ons ... wetteloosheid:** Ps 51:4; 130:8

**\*2:14 vir Hom ... reinig:** Eks 19:5; Deut 4:20; 7:6; 14:2; Eseg 37:23; 1 Pet 2:9

**\*2:14 ywerig ... doen:** Ef 2:10; 1 Pet 3:13

**\*2:15 Moenie ... neersien nie:** 1 Tim 4:12

**\*3:1 Herinner ... onderdanig te wees:** Rom 13:1; 1 Pet 2:13

**\*3:3 Want ... onverstandig:** 1 Kor 6:11; Ef 2:2; 5:8

**\*3:4 God, ons Verlosser:** Tit 1:3; 2:10

<sup>5</sup> het Hy ons verlos —  
nie op grond van werke  
wat ons uit •geregtigheid gedoen het nie,  
maar op grond van sy ontferming\* —  
by wyse van die afwassing deur die weergeboorte\*  
en vernuwing deur die Heilige Gees,\*  
<sup>6</sup>\* wat Hy ryklik oor ons uitgegiet het  
deur Jesus •Christus, ons Verlosser.  
<sup>7</sup> So het ons, geregverdig<sup>f</sup> deur sy genade,\*  
erfgename geword van die ewige lewe  
waarop ons hoop.

<sup>8</sup> Dié uitspraak is betroubaar. Ek wil hê dat jy hierdie dinge moet benadruk, sodat hulle wat in God glo daarop bedag sal wees om hulle aan goeie werke toe te wy. Hierdie dinge is goed en voordelig vir die mense. <sup>9</sup>\* Vermy egter onsinnige dispute en geslagsregisters en stryery en haarklowery oor die wet, want dit is nutteloos en sinloos. <sup>10</sup>\* As iemand verdeeldheid saai, wys hom ná 'n eerste en tweede vermaning weg, <sup>11</sup> omdat jy weet dat so 'n persoon op 'n verkeerde pad is en sonde doen;\* hy veroordeel homself.

---

\***3:5** het Hy ... ontferming: Ef 2:8-9; 2 Tim 1:9

\***3:5** deur die weergeboorte: Ef 5:26

\***3:5** vernuwing ... Gees: Joh 3:5

\***3:6** Joël 2:28; Hand 2:17-21

<sup>f</sup>**3:7** geregverdig: Kan ook vertaal word “vrygespreek”.

\***3:7** geregverdig ... genade: Rom 3:24

\***3:9** 2 Tim 2:14,16,23

\***3:10** Matt 18:15-17

\***3:11** so 'n ... doen: 1 Tim 6:4-5

## Laaste opdragte en groete

<sup>12</sup> Wanneer ek Artemas of Tigikus\* na jou stuur, haas jou om na my te kom in Nikopolis, want ek het besluit om daar te oorwinter. <sup>13</sup> Help ook vir Senas, die regsgeleerde, en vir Apollos\* na die beste van jou vermoë vooruit op hulle reis, sodat hulle niks kortkom nie. <sup>14</sup> Ons mense moet ook leer om hulle, vir die voorsiening van noodsaaklike behoeftes, met goeie werke besig te hou,\* sodat hulle nie vrugteloos sal wees nie.

<sup>15</sup> Almal by my stuur vir jou groete. Groet hulle wat ons in die geloof liefhet.

## Seëngroet

Die genade bly met julle almal.

---

\***3:12 Tigikus:** Hand 20:4; Ef 6:21-22; Kol 4:7-8; 2 Tim 4:12

\***3:13 Apollos:** Hand 18:24; 1 Kor 3:5-6; 16:12

\***3:14 Ons ... hou:** Ef 4:28; Tit 2:14